

(4)

1
FACTVM,

*Pour Monsieur le Cardinal de la Rochefoucault, Abbé de l'Abbaye Sainte Gene-
vieve, & les Religieux de ladite Abbaye; appellans de la sentence renduë par le
Prenost de Paris ou son Lieutenant Civil le 14. Novembre 1639. & demandeurs
en guarantie.*

Contre Maistre Iean Martin, Pierre Boin, & Pierre Clement
Prestres Vicaires, & habituez en l'Eglise Parrochiale S.
Estienne, intimez & defendeurs.

Et encore lesdits Sieur Cardinal, & Religieux defendeurs.


Contre les Marguilliers de ladite Eglise Parrochiale, de
mandeurs & interuenants.

D Ar ladite sentence le Iuge dont est appel, au lieu de
confirmer celle du Bailly de la Iustice tēporelle de
ladite Abbaye, par laquelle a esté dit, que les inthi-
mez délogeront des maisons qu'ils ont tenus à loyer desdits
appellans, & desquelles ils ont fait bail aux Paslez leur
Voyer & Maçons; A ordonné que descente sera faite sur les
lieux, afin de cognoistre de la commodité, ou incommodité
desdits inthimez, & des Parroissiens de ladite Parroisse.

De sorte que ce iugement porte deux notables préiugez au
preiudice des appellans: l'un, que si lesdites maisons accom-
modent les Prestres S. Estienne, que l'habitation leur en se-
ra perpetuellement affectée priuatiuement à tous autres: Et
le second, que les appellans n'auront plus la faculté de fai-
re choix de locataires pour estre assurez de leurs loyers, &
mesme des mauuais inconueniens qui peuuent arriuer par
la negligence desdits locataires; joinct que lesdits habituez
sont le plus souuent personnes passageres, & sans autre re-
uenue que le salaire de leurs Messes, c'est ce qui a donné lieu
audit appel.

Contre lequel les inthimez alleguent quatre moyens: à
sçauoir que de tout temps immemorial, lesdites maisons
ont esté tenuës audit tiltre de loyer, comme elles sont encor
à present, par les Vicaires & habituez de ladite Eglise Par-

A



2

rochiale; Qu'estant icelle Eglise dependante de ladite Abbaye, les appellans sont par consequent tenus de les loger par preference à tous autres.

Que lesdites maisons sont situées en la rue des Prestres, par le moyen dequoy il paroist que ceste denomination est en faueur des Ecclesiastiques de S. Estienne.

Joinct que par vne sentence renduë au Chastelet de Paris le 7. de Septembre 1635. produicte par lesdits inthimez sous la cotte D est iustifié que les appellans auoient fait assigner Maistre Bongrain Docteur en Theologie, cy-deuant Vicaire de ladite Eglise, pour vider & desloger d'une desdites maisons, attendu qu'il n'estoit plus Vicaire, & que ladite maison estoit affectée ausdits Vicaires.

Mais il est vray pour le premier Chef, que ladite location aux Ecclesiastiques S. Estienne, est supposée contre verité, par ce que les appellans ont produict plusieurs contracts de baux sous les cottes E & G de leur premiere production, par lesquels est iustifié que de tout temps elles estoient affermées à des seculiers, autres que gens d'Eglise.

Et est mesme iustifié par vn acte produict par les appellans sous la cotte F de ladite production; que ledit Martin Vicaire le 4. d'Auril 1636. auroit recogneu & confessé, qu'à sa priere & requeste, & pour luy faire plaisir Monsieur le Cardinal de la Rochefoucault Abbé de ladite Abbaye, & lesdits Religieux luy auroient consenty & accordé la iouissance de la maison en laquelle il est demeurant, & promet en continuer le loyer, tant & si longuement qu'il sera sous le bon plaisir dudit Seigneur Abbé & Religieux demeurât en ladite maison, & ledit Martin produict le mesme acte sous la cotte G tellement qu'il ne l'a donc habitée que precairement, & non en consideration qu'elle fut affectée au Vicaire de ladite Eglise S. Estienne.

Il est vray que ne croyant pas que le dit acte qui auoit esté passé en l'absence desdits Religieux peut estre recouuert, les ayant interpellé de luy communiquer le bail qu'il disoit lui en auoir esté fait, auroit deguisé la verité de ladite recognoissā-

ce par le troisieme article de ses interrogatoires, par lesquels il a librement affirmé qu'il auoit signé ledit acte sous ceste clause, qu'il occuperoit ladite maison tant qu'il seroit Vicaire de ladite Eglise, en payant la somme de quatre-vingt liures par an: c'est vne cauillation indigne de sa profession: mais il n'y a pas reussi.

Et quant à la dependance de l'Eglise S. Estienne de ladite Abbaye, de laquelle les inthimez prennent aussi pretexte, les Marguilliers interuenants l'ont deniée au procez à iuger au Conseil du Roy, touchant les droicts de prerogatiues de ladite Abbaye en l'Eglise S. Estienne, où ils ont soustenu que ladite Eglise Curiale ne dependoit point de l'Abbatiale, que le Curé de S. Estienne n'estoit plus Religieux, ains estoit emancipé, & que ce qu'on pretendoit que les Abbez Sainte Geneuieue auoient fait des fondations dans l'Eglise S. Estienne, que ce n'estoit que par cause de restitution, parce que l'Abbé Fouló qui auoit fondé 200 liures pour les Predicateurs qui prescheroiét le Carême, ayant esté Abbé & Curé en mesme temps, c'est à dire ayant la mere & la fille, auroit commis inceste spirituel, & que par consequent ladite fondation n'estoit que la restitution des fruiçts qu'il auoit mal pris, & ne pouuoit les faire siens; ce sont les mesmes termes qu'ils ont deduiçts dans leur inuentaie seruant d'aduertissement, tellement qu'ils ne recognoissent la maternité de ladite Abbaye, que pour calomnier la memoire dudit feu Sieur Abbé Foulon leur bien-faicteur, & pour autoriser leur dite vſurpation, & la defauoüent quand il s'agist du respect que la fille doit à la mere, c'est vne ingratitude intolerable.

Et neantmoins, quoy que ladite Cure soit veritablement dependante de ladite Abbaye, ce n'est point aux appellans, ledit Vicaire, Chapelains non pas mesme au Curé de ladite Eglise: mais aux Parroissiens ausquels ils administrent les SS. Sacrements, & ne fut iamais veu que des Prestres venus de toutes parts, sous pretexte d'habitation en vne Eglise Curiale eussent droict d'asseruir des maisons appartenantes à l'Eglise principale & matrice, sous pretexte du seruice qu'ils rendent à l'Eglise sujette pour leur profit particulier.

Pour ce qui concerne ladite rue des Prestres, la premiere de

Journal
Monsieur ~~MONTESQOT~~ Rapporteur.

nomination estoit la ruë du Moustier, cōme il est iustificié par les mesmes contracts de baux, & est ainsi nommée, parce qu'elle appartient au Monastere Sainte Geneuieue, & faisoit partie du grand Cloistre de ladite Abbaye.

Reste donc ladite sentence, qui est vne piece aussi supposée contre verité, & qui contient vne fausseté fabriquée depuis le present procez, en ce qu'il est dict par icelle, que ledit Maître Bongrain a esté poursuiuy de déloger de ladite maison par le moyen de ce qu'il n'estoit plus Vicaire de S. Estienne, & que ladite maison estoit affectée audit Vicaire, c'est contre la teneur desdits contracts, par lesquels se voit que des seculiers non Ecclesiastiques l'ont tousiours habitée iusques à depuis peu de temps, & que ledit Martin n'a eu la faueur de ladite habitation, que par le moyen de la condition expresse de n'y demeurer que sous le bon plaisir dudit Seigneur le Cardinal de la Rochefoucaut, & desdits Religieux.

Et de plus, que ladite supposition est iustificée par sentence rendue audit Chastelet de Paris le Merctedy 12. Septébre 1635. produite par les appellans sous la cotte D par laquelle n'est fait mention ny prés ny loin de ladite affectation, & est la veritable sentence rendue entre lesdites parties, au lieu que celle des defendeurs n'est qu'une escriture priuée qu'on a fait à plaisir, en faueur des inthimez: & ne pourroit s'excuser le Procureur des appellans, qu'on dit y auoir comparu pour eux, de conuention de l'auoir passée en faueur du Sieur Curé S. Estienne son Oncle, si tant estoit qu'elle fust procedée de sa part, & en se faisant il porteroit son desauou sans contredit, par le moyen de ladite sentence veritable: mais y a apparence que ladite piece supposée procede du fait dudit Martin, veu ladite affirmation captieuse & contraire à son propre fait.

C'est pourquoy les appellans sont bien fondez à demander que sans auoir esgard à l'interuention desdits Marguilliers, dont ils seront deboutez avec despens, qu'il soit dit que la sentence du Bailly Sainte Geneuieue sera excurée, & les inthimez condamnés à les acquitter des poursuites desdits Paslez & en leurs despens dommages & intersts.

